

# Sachchā Shāgird



*sachchā shāgird*

A True Disciple

by Bakhtullah

[*Ao, Khud Dekh Lo 17*]

(Urdu—Roman script)

© 2023 [www.chashmamedia.org](http://www.chashmamedia.org)

*published and printed by*

Good Word, New Delhi

The title cover is a collage of torstenbreswald  
<https://pixabay.com/vectors/chain-broken-chain-line-art-6202299/>;  
ractapopulous <https://pixabay.com/illustrations/background-scrapbooking-texture-2037172/>.

Bible quotations are from UGV.

*for enquiries or to request more copies:*

[askandanswer786@gmail.com](mailto:askandanswer786@gmail.com)

## **Fahrist**

<b>Shāgird ko Zindagī kā Nūr Hāsil Hai</b>	<b>2</b>
<b>Shāgird Apne Gunāhoñ meñ Nahīñ Maregā</b>	<b>6</b>
<b>Shāgird Jāntā Hai ki Nūr Kahāñ Se Hai</b>	<b>7</b>
<b>Shāgird Gunāh kī Ġhulāmī se Āzād Hai</b>	<b>10</b>
<b>Shāgird Abadī Maut Nahīñ Dekhegā</b>	<b>14</b>
<b>Injīl, Yūhannā 8:12-59</b>	<b>16</b>

Jhonpariyon kī Īd thī. Is īd par log faslon kī k̄hushī manāte the, yih ki K̄hudā ne bārish barsākar faslen paidā kī haiñ. Sāth sāth wuh yād karte the ki ek din al-Masīh ākar sab kuchh bahāl karegā. Us waqt Baitul-muqaddas ke nīche se pānī bah niklegā. Islie K̄hudāwand Īsā ne isī īd par khare hokar farmāyā thā ki jo pyāsā ho wuh mere pās āe, aur jo mujh par īmān lāe wuh pie. Tab us ke andar se zindagī ke pānī kī nahreñ bah nikleñgī. Is se wuh sāf kah rahā thā ki main hī al-Masīh hūñ, aur mujh par īmān lākar tumheñ abadī zindagī milegī.

► *Jis ne abadī zindagī kā pānī pī liyā hai wuh kyā hai?*

Wuh Īsā Masīh kā shāgird hai. Lekin shāgird hone kā kyā matlab hai? Īsā Masīh ko jhūṭhe shāgirdon meñ koī dilchaspī nahīñ hai. Wuh

sachche shāgird chāhtā hai. Yahī wajah hai ki ab us ne sachche shāgird kā mazmūn chheṛā. Pahlī bāt,

## **Shāgird ko Zindagī kā Nūr Hāsil Hai**

Jhonpariyonī kī Īd kā ek nishān pānī thā. Dūsrā nishān raushnī thī. Rāt ke waqt Baitul-muqaddas meñ baṛe baṛe charāghdān jalāe jāte the. In kī raushnī meñ Yarūshalam shahr kā konā konā chamaktā-damaktā thā. Īd ke daurān imāndār pūrī rāt Baitul-muqaddas meñ ḳhushī manāte the.

► *Charāghdānonī ke pīchhe kyā ḳhyāl thā?*

Raushnī Ḳhudā ke nūr kī taraf ishārā hai. Jo Ḳhudā ke nūr meñ chaltā hai wuh sahī rāh pakaṛ letā hai. Na sirf yih balki pānī kī tarah yih raushnī us nūr kī taraf ishārā thī jo al-Masīh lāegā. Yoñ Zakariyāh nabī ne peshgoī kī thī,

Na din hogā aur na rāt balki shām  
ko bhī raushnī hogī. (Zakariyāh 14:7)

Matlab hai al-Masīh ke āne par rāt bhī raushan hogī. Kyoñki wuh nūr kā sarchashmā hogā.

Is id par Īsā Masīh kah chukā thā ki main zindagī ke pānī kā sarchashmā hūn. Ab us ne khaṛe hokar farmāyā,

Duniyā kā nūr main hūn. Jo merī pairawī kare wuh tārīkī meñ nahīn chalogā, kyonki use zindagī kā nūr hāsil hogā. (Yūhannā 8:12)

► *Kaun duniyā kā nūr hai?*

Īsā Masīh.

► *Īsā Masīh ne is id par yih bāt kyon farmāi?*

Pānī kī tarah nūr al-Masīh kā nishān hai.

► *Duniyā kā yih nūr hamen kyā dilātā hai?*

- Nūr rāste ko raushan kar detā hai. Tab ham duniyā kī tārīkī meñ nahīn chaleṅge. Ham najāt ke rāste par chaleṅge.
- Nūr zindagī dilātā hai. Raushnī ke baḡhair paudhā murjhā jātā hai. Raushnī ke baḡhair insān bhī āhistā āhistā khatm ho jātā hai. Isī tarah nūr hamen rūhānī zindagī dilātā

hai, hamen̄ ṭhīk manzil tak pahuñchātā hai,  
hamen̄ abadī zindagī dilātā hai.

Ek din kā zikr hai ki ek bij ek sūkhe hue kuen̄  
men̄ gir gayā. Jahān girā wahān tak sūraj kī kirneñ  
nahīn̄ pahuñchtī thīn̄. Phir bhī bij se nāzuk-sā  
paudhā phūṭ niklā jo āhistā āhistā kuen̄ ke muñh  
tak barhne lagā. Ām taur par is qism kā paudhā  
sīrf do-chār inch lañbā ho jātā hai. Lekin raushnī  
ko ḍhūndṭe ḍhūndṭe yih paudhā sau foot se zyādā  
lañbā ho gayā. Āḡhirkār wuh kuen̄ ke muñh aur  
sūraj kī kirnoñ tak pahuñch gayā.

► *Is paudhe ko pūrī raushnī aur zindagī kyon̄ milī?*

Islie ki wuh raushnī ke pīchhe paṛā rahā. Najāt  
kā ek hī rāstā hai: us nūr ke pīchhe chalnā jo Īsā  
Masīh hai.

► *Kyā ham aisī shiddat se nūr ke pīchhe paṛ gae haiñ?*

Īsā Masīh kā yih dāwā sunkar sunane wāle etarāz  
karne lage, “Āp to apne bāre men̄ gawāhī de rahe  
haiñ. Aisī gawāhī motabar nahīn̄ hotī.” Yih etarāz  
pahle bhī kiyā jā chukā thā (dekhie bāb 5). Us waqt

Īsā Masīh ne tafsīl se iskā jawāb diyā thā. Is mauqe par us ne yih farmānā kāfī samjhā ki main aur merā Bāp donoñ is ke motabar gawāh haiñ. Maslā main nahīn hūn balki tum. Us ne farmāyā,

Main jāntā hūn ki main kahān se āyā hūn aur kahān ko jā rahā hūn. Lekin tum ko to mālūm nahīn ki main kahān se āyā hūn aur kahān jā rahā hūn.  
(Yūhannā 8:14)

► *Maslā kyā thā?*

Jab sūraj kī kirneñ ham par paṛtī haiñ to ham jān lete haiñ ki yih sūraj se niklī huī haiñ. Ham yih bhī jān lete haiñ ki in se zamīn raushan hokar phal lātī hai. Ilāhī sūraj kā nūr duniyā meñ āyā thā magar in muḥālifoñ ke dil raushan nahīn hue the na wuh rūhānī phal lāe the. Afsos!

Īsā Masīh unheñ āgāh karnā chāhtā thā, islie us ne farmāyā ki sirf sachche shāgird ko zindagī kā nūr hāsil hai. Dūsre,



## Shāgird Apne Gunāhoñ meñ Nahīñ Maregā

Us ne farmāyā,

Maiñ jā rahā hūñ aur tum mujhe  
ḍhūñḍ ḍhūñḍkar apne gunāhoñ meñ  
mar jāoge. Jahāñ maiñ jā rahā  
hūñ wahāñ tum nahīñ pahuñch sakte.  
(Yūhannā 8:21)

Aksar log shiddat se al-Masīh kā intazār kareñge, magar be-fāydā. Wuh apne gunāhoñ meñ mar jāeñge.

► *Kis chīz meñ mar jāeñge?*

Apne gunāhoñ meñ.

► *Kyon?*

Īsā Masīh ne salīb par apnī jāñ dī tāki hamāre gunāh miṭ jāeñ. Jo us ke pīchhe ho le us ke gunāh miṭ gae haiñ. Lekin jo use qabūl na kare us ke gunāh hameshā tak raheñge. Islie wuh apne gunāhoñ meñ mar jāegā.

► *Jo apne gunāh meñ mar jātā hai kyā use jannat kī ummīd hai?*

Nahīn. Gunāh insān ko ẖhudā se dūr rakh detā hai. Sirf Īsā Masīh ke pāk nūr meñ rahne se najāt milegī. Usī meñ rahkar hamāre gunāh dūr ho jāte haiñ. Koī aur hal nahīn.

► *Mere dost, kyā āpko najāt kā yaqīn hai?*

Bahut-sāre log najāt ko ḍhūṇḍte ḍhūṇḍte halāk ho rahe haiñ.

► *Kyon?*

Islie ki wuh Masīh ke nūr meñ nahīn āe haiñ. Aise logoñ ko Īsā Masīh farmātā hai ki jahān main jā rahā hūñ wahāñ tum nahīn pahūñch sakte. Sirf sachchā shāgird apne gunāhoñ meñ nahīn maregā. Lekin sachche shāgird kā ek tīsrā nishān hai.

## **Shāgird Jāntā Hai ki Nūr Kahān Se Hai**

Sunane wāloñ ne pūchhā ki āp kaun haiñ?

Us ne farmāyā,

Main wuhī hūñ jo main shurū se hī batātā āyā hūñ. (Yūhannā 8:25)

► *Kyā matlab hai?*

Maiñ apne kām aur kalām se tum par zāhir huā hūñ, phir bhī tum īmān nahīñ lāe. Īsā Masīh jāntā thā ki tū tū maiñ maiñ karne se bāt nahīñ banegī. Jo log īmān lānā nahīñ chāhte unheñ manwānā be-kār hai. Phir us ne ek bāt farmāī jo samajhne meñ mushkil hai,

Jab tum Ibn-e-Ādam ko ūñche par chaṛhāoge tab hī tum jān loge ki maiñ wuhī hūñ. (Yūhannā 8:28)

- *Ibn-e-Ādam ko ūñche par chaṛhāne kā kyā matlab hai?*

Ibn-e-Ādam se murād Īsā Masīh hai. Us ke muḵhālif use ūñche par yānī salīb par chaṛhāenge. Lekin wuh murdoñ meñ nahīñ rahegā. Wuh jī uṭhkar āsmān par uṭhā liyā jāegā aur ek din duniyā kī adālat karne ke lie lauṭegā. Us waqt sab jān leñge ki wuh kaun hai.

- *Wuh kyā jān leñge?*

Masīh farmātā hai, wuh jān leñge ki maiñ wuhī hūñ.

► *Iskā kyā matlab hai?*

Jab ẖudā ne Mūsā nabī ko hidāyat dī ki wuh Isrāīliyon ko Misr se Falastīn le jāe to Mūsā ne pūchhā ki main kyā kahūn jab wuh kaheᅅge ki kis ne tujhe bhej diyā hai, uskā nām kyā hai? ẖudā ne jawāb diyā,

Main jo hūn so main hūn. Un se kahnā, ‘Main hūn ne mujhe tumhāre pās bhejā hai.’

(Tauret, ẖhurūj 3:14)

Isī tarah ẖudā ne Yasāyāh nabī ke wasīle se farmāyā thā,

Ai Isrāīlī qaum, tum hī mere gawāh ho, tum hī mere ẖhādīm ho jise mainne chun liyā tāki tum jān lo, mujh par īmān lāo aur pahchān lo ki main hī hūn. (Yasāyāh 43:10)

► *Isrāīl kyā pahchān le?*

Ki main hī hūn.

► *Kyon?*

Har maḳhlūq ke pīchhe wuhī hai. Us ke pīchhe yā ūpar kuchh nahīn hai. Wuh hai isī lie ham haiñ. Ab Īsā Masīh ne farmāyā ki maiñ hī hūñ.

► *Is se wuh kyā kahnā chāhtā thā?*

Maiñ jo Farzand hūñ Ḳhudā Bāp se bhejā gayā hūñ, islie maiñ hī hūñ. Ḳhudā Bāp sūraj hai, maiñ uskī raushnī hūñ. Islie maiñ sirf wuh kuchh kartā hūñ jo Ḳhudā Bāp kī marzī hai. Yih ek bahut azīm bāt hai jo ham meñ se koī bhī apne bāre meñ nahīn kah saktā.

Us ke muḳhālif soch-bichār meñ paṛ gae ki kyā yih kufr nahīn hai? Lekin bahut-se log us par īmān lāe. Sachchā shāgird jāntā hai ki nūr kahān se hai. Wuh jāntā hai ki wuh ‘Maiñ Hūñ’ hai. Sachche shāgird kā ek chauthā nishān:

### **Shāgird Gunāh kī Ḡhulāmī se Āzād Hai**

Us ne farmāyā,

Agar tum merī tālīm ke tābe rahoge tab hī tum mere sachche shāgird hoge. Phir tum sachchāi ko jān loge aur sachchāi tum ko āzād kar degī.  
(Yūhannā 8:31-32)

- ▶ *Sachchā shāgird kaun hai?*  
Wuh jo Masīh kī tālīm ke tābe rahegā.
- ▶ *Tābe rahne kā kyā matlab hai?*  
Yih ki shāgird uskī hukūmat ke taht ho. Ki nūr kī kirneñ dil kā konā konā raushan karen.
- ▶ *Sachchā shāgird kyā jān legā?*  
Sachchāi ko.
- ▶ *So sachchāi ko jānane kā pahlā qadam kyā hai?*  
Uskā pahlā qadam nūr ke tābe ho jānā hai. Pahle mujhe yih qabūl karnā hai ki Īsā Masīh merā āqā, merā nūr hai. Tab hī main sachchāi ko jān lūngā. Is ke ulaṭ nahīn ho saktā. Pahle nūr merī zindagī ko raushan kare, tab hī main sachchāi ko jān saktā hūn.
- ▶ *Sachchāi ko jān lene ke bād kyā natījā niklegā?*

Sachchāi sachche shāgird ko āzād kar degī.

- ▶ *Lekin sachchāi kyā hai?*

Sachchāi khud Īsā Masīh hai jis meñ Khudā Bāp zāhir huā hai. Wuhī hameñ āzād karegā (dekhie Yūhannā 8:36).

- ▶ *Sachchāi kis chīz se āzād karegī?*

Ġhulāmī se.

Yahūdiyon ne etarāz kiyā, “Ham to Ibrāhīm kī aulād haiñ, ham kabhī bhī kisī ke ġhulām nahīn rahe. Phir āp kis tarah kah sakte haiñ ki ham āzād ho jāenge?” Yahūdī to is par bahut faḡhr karte the ki ham Ibrāhīm kī āzād aulād haiñ. Go Romī ham par hukūmat karen to bhī hamārī fitrat āzād hai. Lekin yahāñ Īsā Masīh haqīqī āzādī kī bāt kar rahā thā—rūhānī āzādī kī bāt. Us ne farmāyā,

Jo bhī gunāh kartā hai wuh gunāh kā ġhulām hai. (Yūhannā 8:34)

- ▶ *Kaun rūhānī ġhulām hotā hai?*

Jo bhī gunāh kartā hai. Kyonki wuh gunāh kā ġhulām hai.

- *Kyā koī insān hai jo gunāh nahīn kartā?*

Ek bhī nahīn. Is duniyā meñ sirf Īsā Masīh be-gunāh thā. Koī bhī insān nahīn hai jo apnī hī tāqat se gunāh se dūr rah sake. Ham sab gunāhgār haiñ. Islie ham sab ke sab gunāh ke ġhulām haiñ. Sirf ek hai jo hameñ āzād kar saktā hai: Īsā Masīh. Īsā Masīh duniyā kā nūr hai. Uskī pāk raushnī meñ insān apnī kisī bhī chīz par faḡhr nahīn kar saktā. Har chīz jis par ham faḡhr karte haiñ is raushnī meñ nāqis sābit hotī hai.

- *To phir ham kis tarah gunāh kī ġhulāmī se āzād ho sakte haiñ?*

Duniyā ke nūr se jo is duniyā meñ nāzil huā tāki insān ko gunāh se āzād kare.

- *Āzād ho jāne ke lie kyā zarūrī hai?*

Zarūrī hai ki uskā kalām hamāre andar base. Uskā nūr hamāre tārīk dilon ko raushan kare. Yahī us ke tābe rahne kā matlab hai. Yon hī sachchā shāgird gunāh kī ġhulāmī se āzād ho



jātā hai. Īsā Masīh ke muḵhālīf raushan nahīn hue the. Un kā haqīqī bāp Ibrāhīm nahīn balki Iblīs thā jis ne unheñ tārīkī kī zanjīron meñ jakaṛ liyā thā.

Sachche shāgird ke bāre meñ ek āḵhirī bāt,

### **Shāgird Abadī Maut Nahīn Dekhegā**

Īsā Masīh ne farmāyā,

Jo bhī mere kalām par amal kartā rahe wuh maut ko kabhī nahīn dekhegā.  
(Yūhannā 8:51)

Us ke muḵhālīf nārāz hue. Unhoñ ne pūchhā ki yih kis tarah ho saktā hai? “Kyā tum hamāre bāp Ibrāhīm se baṛe ho? Wuh mar gayā, aur nabī bhī mar gae. Tum apne āpko kyā samajhte ho?”

Īsā Masīh ne jawāb diyā,

Tumhāre bāp Ibrāhīm ne ḵhushī manāi jab use mālūm huā ki wuh merī āmad kā din dekhegā, aur wuh use dekhkar masrūr huā. (Yūhannā 8:56)

► *Us ne ḵhushī kyon manāi?*

Ibrāhīm nabī thā. Islie us ne dekhā ki ek āne wālā hai jo mujh se baḥkar hai. Duniyā kā nūr āne wālā hai jo insān ko gunāh kī ḡhulāmī se najāt degā.

Yahūdiyon ne etarāz kiyā, “Tumhārī umr to abhī pachās sāl bhī nahīn, to phir tum kis tarah kah sakte ho ki tum ne Ibrāhīm ko dekhā hai?”

Īsā Masīh ne farmāyā,

Ibrāhīm kī paidāish se peshtar ‘Main hūn’. (Yūhannā 8:58)

Yih bāt Yahūdī bardāsht nahīn kar sakte the. Wuh use sangsār karne ke lie patthar uṭhāne lage.

► *Kyon?*

Ab Īsā Masīh ne apne bāre meñ sāf sāf kahā thā ki ‘Main hūn.’ Na sirf main Ibrāhīm se pahle thā balki main Ibrāhīm se pahle hūn. Matlab hai abad se hūn. Main ilāhī sūraj kā nūr hūn. Main wuh hūn jo is duniyā meñ nāzil huā tāki tumheñ gunāh kī ḡhulāmī se āzād kare. Yih Yahūdiyon kī nazar meñ kufr thā.

Mere azīz, bahut-se log yih rūhānī haqīqat qabūl nahīn kar sakte. Un ke nazdīk Īsā Masīh achchhā insān aur azīm nabī thā. Lekin wuh yih qabūl nahīn kar sakte ki wuh duniyā kā nūr hai, ki wuh ‘Main hūn’ yānī Ḳhudā kā Farzand hai. Lekin aise logoñ se main ek hī sawāl pūchhnā chāhtā hūn,

- ▶ *Āp kis tarah gunāh kī ghulāmī se āzād ho jāenge?*  
Usī ke pās yih iḳhtiyār hai, wuhī pūrī tarah pāk hai, wuhī hamāre gunāhoñ ko miṭākar hameñ jannat meñ dāḳhil hone ke qābil banā saktā hai. Koī aur wasīlā nahīn hai.

### **Injīl, Yūhannā 8:12-59**

Phir Īsā dubārā logoñ se muḳhātib huā, “Duniyā kā nūr main hūn. Jo merī pairawī kare wuh tārīkī meñ nahīn chalegā, kyoñki use zindagī kā nūr hāsil hogā.”

Farīsiyoñ ne etarāz kiyā, “Āp to apne bāre meñ gawāhī de rahe haiñ. Aisī gawāhī motabar nahīn hotī.”

Īsā ne jawāb diyā, “Agarche main apne bāre meñ hī gawāhī de rahā hūñ to bhī wuh motabar hai. Kyoñki main jāntā hūñ ki main kahāñ se āyā hūñ aur kahāñ ko jā rahā hūñ. Lekin tum ko to mālūm nahīñ ki main kahāñ se āyā hūñ aur kahāñ jā rahā hūñ. Tum insānī soch ke mutābiq logoñ kā faislā karte ho, lekin main kisī kā bhī faislā nahīñ kartā. Aur agar faislā karūñ bhī to merā faislā durust hai, kyoñki main akelā nahīñ hūñ. Bāp jis ne mujhe bhejā hai mere sāth hai. Tumhārī sharīat meñ likhā hai ki do ādmiyoñ kī gawāhī motabar hai. Main khud apne bāre meñ gawāhī detā hūñ jabki dūsrā gawāh Bāp hai jis ne mujhe bhejā.”

Unhoñ ne pūchhā, “Āpkā bāp kahāñ hai?” Īsā ne jawāb diyā, “Tum na mujhe jānte ho, na mere Bāp ko. Agar tum mujhe jānte to phir mere Bāp ko bhī jānte.”

Īsā ne yih bāteñ us waqt kīñ jab wuh us jagah ke qarīb tālīm de rahā thā jahāñ log apnā hadiyā dālthe the. Lekin kisī ne use giriftār na kiyā kyonki abhī uskā waqt nahīñ āyā thā.

Ek aur bār Īsā un se muḵhātib huā, “Main jā rahā hūñ aur tum mujhe ḍhūñḍ ḍhūñḍkar apne gunāhoñ meñ mar jāoge. Jahāñ main jā rahā hūñ wahāñ tum nahīñ pahuñch sakte.”

Yahūdiyoñ ne pūchhā, “Kyā wuh ḵhudkushī karnā chāhtā hai? Kyā wuh isī wajah se kahtā hai, ‘Jahāñ main jā rahā hūñ wahāñ tum nahīñ pahuñch sakte?’”

Īsā ne apnī bāt jāri rakhī, “Tum nīche se ho jabki main ūpar se hūñ. Tum is duniyā ke ho jabki main is duniyā kā nahīñ hūñ. Main tum ko batā chukā hūñ ki tum apne gunāhoñ meñ mar jāoge. Kyonki agar tum īmān nahīñ lāte ki main wuhī hūñ to tum yaqīnan apne gunāhoñ meñ mar jāoge.”

Unhoñ ne sawāl kiyā, “Āp kaun haiñ?”

Īsā ne jawāb diyā, “Main wuhī hūn jo main shurū se hī batātā āyā hūn. Main tumhāre bāre meñ bahut kuchh kah saktā hūn. Bahut-sī aisī bāteñ haiñ jin kī binā par main tum ko mujrim ṭhahrā saktā hūn. Lekin jis ne mujhe bhejā hai wuhī sachchā aur motabar hai aur main duniyā ko sirf wuh kuchh sunātā hūn jo mainne us se sunā hai.”

Sunane wāle na samjhe ki Īsā Bāp kā zikr kar rahā hai. Chunāñche us ne kahā, “Jab tum Ibn-e-Ādam ko ūñche par chaṛhāoge tab hī tum jān loge ki main wuhī hūn, ki main apnī taraf se kuchh nahīñ kartā balki sirf wuhī sunātā hūn jo Bāp ne mujhe sikhāyā hai. Aur jis ne mujhe bhejā hai wuh mere sāth hai. Us ne mujhe akelā nahīñ chhoṛā, kyonki main har waqt wuhī kuchh kartā hūn jo use pasand ātā hai.”

Yih bāteñ sunkar bahut-se log us par īmān lāe.

Jo Yahūdī uskā yaqīn karte the Īsā ab un se hamkalām huā, “Agar tum merī tālīm ke tābe rahoge tab hī tum mere sachche shāgird hoge. Phir tum sachchāī ko jān loge aur sachchāī tum ko āzād kar degī.”

Unhoñ ne etarāz kiyā, “Ham to Ibrāhīm kī aulād haiñ, ham kabhī bhī kisī ke ġhulām nahīñ rahe. Phir āp kis tarah kah sakte haiñ ki ham āzād ho jāenge?”

Īsā ne jawāb diyā, “Maiñ tum ko sach batātā hūñ ki jo bhī gunāh kartā hai wuh gunāh kā ġhulām hai. Ġhulām to ārizī taur par ghar meñ rahtā hai, lekin mālik kā beṭā hameshā tak. Islie agar Farzand tum ko āzād kare to tum haqīqatan āzād hoge. Mujhe mālūm hai ki tum Ibrāhīm kī aulād ho. Lekin tum mujhe qatl karne ke darpai ho, kyonki tumhāre andar mere paighām ke lie gunjāish nahīñ hai. Maiñ tum ko wuhī kuchh batātā hūñ jo mainne

Bāp ke hāñ dekhā hai, jabki tum wuhī kuchh sunāte ho jo tum ne apne bāp se sunā hai.”

Unhoñ ne kahā, “Hamārā bāp Ibrāhīm hai.”

Īsā ne jawāb diyā, “Agar tum Ibrāhīm kī aulād hote to tum us ke namūne par chalte. Is ke bajāe tum mujhe qatl karne kī talāsh meñ ho, islie ki mainne tum ko wuhī sachchāi sunāi hai jo mainne Allāh ke huzūr sunī hai. Ibrāhīm ne kabhī bhī is qism kā kām na kiyā. Nahīñ, tum apne Bāp kā kām kar rahe ho.”